

rentiae causa abstergere debet. Nulla vero est obligatio abstinendi a communione propter maculam occultam aut publicam, sed indelebilem. *Ita omnes.*

2º Sacerdos infectus lepra vel alia difformitate horrorem excitante, in secreto celebrare potest, sed non in publico, ut in Decretal. l. 3, tit. 7, cap. 4, expresse statuitur.

3º Mulieres in ornatu sancto, modestiam redolente, pectore cooperto, ad sacram communionem accedere debent: si quae valde indecentes se praesentarent, communionio eis neganda esset, cum debitum tamen cautionibus ad praecavenda scandala.

4º Nulla lege vetatur ne vir armatus ad sacram synaxim accedat, sed ex decentia et humilitatis causa, milites arma sua deponere solent, nisi ex professione religiosa ea deferant, ut olim equites S. Joannis Hierosolymitani.

5º Sacerdos non celebrans et ad sacram communionem accessurus, superpelliceo et stola induendus est. Ita olim statuerat Concil. Bracarense III, can. 3; sic statuit etiam Rituale Romanum: *Sacerdotes vero cum stola communient.* Sacerdotes cum stola pendente (*Cæremon. Episcop.*, l. 2, cap. 23, n. 6), et etiam diaconi cum stola a sinistro humero ad latus dextrum protensa (*Catalani in Rit.*, t. 1, p. 265), quod negat *Cavalieri*, t. 1, cap. 1, decreto 5. Certum est tamen ex omnium confesso, hanc circumstantiam esse duntaxat sub veniali, et nullum esse peccatum eam omittere, si rationabilis causa id fieri suadeat, ut major communicantium numerus et non habeatur in communione solemnitas, ut, v. g., in feria V Majoris Hebdomadæ.

CAPUT SEXTUM.

DE NECESSITATE EUCHARISTIAE.

Quoniam sanctissimum illud sacramentum olim parvulis statim post Baptismum administrabatur, et in Ecclesia Orientali adhuc administratur, quidam arbitrati

sunt Graeci illud necessarium esse necessitate medii, sicut Baptismum: hoc antiquos Patres persuasum habuisse docent Calvinistæ, et in primis *Aubertin* et *Daillé*, quod evidenter falsum est; antiqui Patres enim Eucharistiam tribuebant parvulis tanquam utilem, non vero ut ad salutem necessariam, et ideo vetus ille usus abrogatus est sine ulla reclamatione. Unde concil. Trid., sess. 21, cap. 4, docet « parvulos, usu rationis carentes, nulla » obligari necessitate ad sacramentalem Eucharistiae » communionem; » et can. 4 addit: « Si quis dixerit » parvulis, antequam ad annos discretionis pervenerint, » necessariam esse Eucharistiae communionem; ana- » thema sit. » Semper creditum est parvulos in Baptismo regenerari, ac proinde ante usum rationis decedentes, salvandos esse sine Eucharistia.

Constat igitur et de fide est Eucharistiam non esse necessariam necessitate medii ad salutem. Itaque nobis inquirendum est an sit necessaria, 1º ex precepto divino; 2º ex precepto ecclesiastico; 3º sub utraque specie; 4º frequenter.

ARTICULUS PRIMUS.

AN SACRA EUCHARISTIA SIT AD SALUTEM NECESSARIA EX PRÆCEPTO DIVINO.

Tria hic nobis occurruunt examinanda, nempe 1º an præceptum existat; 2º quinam eo teneantur; 3º quondam obliget.

1º Certum est dari præceptum divinum sacram suscipiendi Eucharistiam, ut constat 1º ex verbis Christi, *Joan.* vi, 54: *Nisi manducaveritis carnem Filii hominis et biberitis ejus sanguinem, non habebitis vitam in vobis;* et *Luc.* xxii, 19: *Hoc facite in meam commemorationem.* Quæ verba veram exprimunt necessitatem, non medii, ut notavimus, sed præcepti. 2º Ex concil. Trid., sess. 13, cap. 2, dicente: *In illius (sacramenti) sumptione colere nos sui memoriam præcepit.* 3º Ex ratione: Christus divinum Eucharistiae sacramentum per modum cibi et

refectionis spiritualis instituit : noluit autem illud fore inutile : ergo illius usum præcepit. Ergo.

2º Eo præcepto omnes tenentur adulti usum rationis habentes ; verba enim Christi, *Nisi manducaveritis*, etc., generalia sunt et nullos excipiunt ; immediate afficiunt fideles, et mediate ipsos infideles qui religionem christianam amplecti et ad sacram Eucharistiam se accingere tenentur.

3º Illud præceptum obligat saltem in articulo vel in proximo mortis periculo ; de natura est enim præcepti affirmativi ut saltem aliquando obliget : at, si præceptum divinum sacram suscipiendo Eucharistiam non obligaret saltem in articulo vel in proximo mortis periculo, dicendum esset illud nunquam stricte obligaturum. Unde 1º concil. Nicæn. I, can. 12, statuit *antique legis* regulam servandam esse, *ut si forte quis recedat ex corpore, necessario vice suæ viatico non defraudemur*. 2º Semper sollicita fuit Ecclesia ut sanctum viaticum moribundis tribueretur, nisi tanto beneficio judicarentur indigni. 3º Sanctum istud sacramentum infirmo petenti et sufficierter disposito denegari non posset sine gravi fidelium scando. Ergo.

Obligat insuper plures in vita, præcise quia per modum refectionis spiritualis fuit institutum : tempus autem a Christo non fuit assignatum, sed Ecclesia illud determinavit, ut infra dicemus.

Hinc mulieres prægnantes ante primum partum, vel si partus difficiles jam habuerunt, periculose navigaturi aut præliaturi, operationem periculosam experturi, etc., Eucharistiam suscipere debent, si moraliter possint.

Notanda circa viaticum.

1º Quamvis existat præceptum divinum sacram Eucharistiam in periculo mortis suscipiendo, non repugnat eam aliquando prohiberi, si nempe reverentia erga sanctissimum Sacramentum id postulare videatur : nam præceptum divinum directioni Ecclesiæ committitur, et ubi decenter impleri nequit, non obligat.

2º Pueris doli capacibus, qui sufficientem habent notitiam tum divinæ Eucharistiae ejusque effectuum, tum aliarum veritatum, quarum cognitio ad justificationem requiritur, dandum est viaticum in periculo mortis, etsi non habeant ætatem ad primam communionem requisitam : ita Bened. XIV, de Synodo diœces., l. 7, cap. 12, n. 4 ; S. Ligorius, l. 6, n. 293, etc. In dubio de capacitate pueri, alii contra alios dicunt viaticum non esse concedendum. Nos adhærendum putamus Statutis nostris quæ sic habent : *In dubio pars decubanti utilior est eligenda*. Prudentis est autem confessarii, ex diversis adjunctis, judicare quid futurum sit utilius ægrotanti. Pueri, qui, sacro viatico muniti, supersunt, non eximuntur ab obligatione catesibus assistendi et primam communionem more solito faciendi.

3º Disputant theologi an qui heri vel hodie communionem accepit aut Missam celebravit, et ante finem diei in grave periculum mortis incidit, sacram viaticum suscipere possit aut debeat. Si heri communio suscepta fuerit, datur obligatio viaticum hodie suscipiendo ; si hodie, res manet dubia. Probabilius videtur viaticum administrari posse, et strictum non existere præceptum illud dandi aut suscipiendo, quia communio eadem die accepta rationem viatici habere censetur. « In tanta opinionum varietate doctorumque discrepantia, integrum erit parocho eam sententiam amplecti quæ sibi magis arriserit, » inquit Bened. XIV, de Synodo diœces., l. 7, cap. 11, n. 2.

4º Si in ægroto adsit periculum ejectionis hostiæ, propter vomitum, tussim, sputa quasi perpetua, non danda est Eucharistia ob reverentiam ei debitam ; si periculum videatur dubium, danda est particula non consecrata, quam si rejiciat, a communione abstinendum est ; si eam retineat, administrari debet communio. S. Ligorius, l. 6, n. 292.

5º Si contingat ut ægrotus post sumptionem viatici evomat, et sacrae species appareant, reverenter erunt colligendæ, in vase mundo deponendæ, ad ecclesiam defe-

rendæ ibique custodiendæ donec fuerint corruptæ, et tunc in piscinam sacram projicientur. Si vero non apparet, tota materia vomita erit stupis extergenda, comburenda et cineres in piscinam projiciendi.

6º Non desunt sacerdotes qui sanctum viaticum magnis peccatoribus facile denegant, sub prætextu quod illud non sit absolute necessarium. Advertant præceptum divinum tunc urgere, sub peccato mortali obligare, et seipso strictissime teneri tales moribundos pro posse suo ad Eucharistiam præparare. Statuitur quidem, in Rituall Romano, eos sacrum viaticum suscipere non posse, quin publicæ offensioni, prout de jure, satisficerint. Verum sufficienter satisfaciunt, peccata confitendo, et declarando coram testibus se de anteactis dolere, atque firmum habere propositum rectius in posterum vivendi, nisi aliqua specialis ipsis incumbat obligatio publica, v. g., restituendi, reconciliandi, concubinam ejiciendi, etc., quæ prius implenda est.

Item qui per scripta publica contra fidem aut mores scandalum dedit vel famam alicujus injuste laesit, per scriptum, si possit, aut saltem per declarationem coram testibus, malum, quantum fieri potest, reparare debet.

7º Sacrum viaticum deferri non potest ad meretricem poenitentem, in domo publice meretricia adhuc existentem : exigendum est ut prius exeat et in honesta domo collocetur, ob reverentiam sanctissimo Sacramento debitam.

8º A suscipiendo sacro viatico excusat impotentia physica et moralis, sive ex parte infirmi, sive ex parte ministri, sive ex parte circumstantiarum, v. g., ex impietate astantium, etc.

9º Qui non communicavit in periculo mortis, transacto periculo, supplere non tenetur, quia obligatio viatici est duntaxat pro periculo.

10º Qui post viaticum susceptum mortaliter peccavit, iterum communicare probabilius non tenetur, quia hæc obligatio nullibi præscribitur, sed sufficit confessio. Sic plures cum S. Ligorio. Item qui sacrum viaticum sacri-

lege suscepisset, illud denuo suspicere non posset ante decimum diem, ex statutis diocesanis nostris, et cæmoniæ externæ non iterarentur in nova susceptione ; quia, cum indignitas sit occulta, prohibitio Ecclesiae valet pro foro externo. Verum decima die, periculo remanente, moribundus convenienter dispositus, de novo, absque viatici cæmoniis, communicare deberet, quia per communionem sacrilegam reipsa non satisfecit. Imo antea, si jejunus manere posset.

11º Sancti viatici sicut Extremæ Unctionis administratio ad solum pertinet pastorem : extraneus igitur sacerdos sive regularis, sive sæcularis, illud administrare non potest sine legitimi ægrotantis parochi licentia expresse data, excepto casu urgentis necessitatis, in quo licentia parochi aut Ordinarii rationabiliter presumitur.

12º Parochi hoc munus committere non possunt nisi sacerdoti approbato, ne ægrotus ministerio confessarii ante communionem indigeat.

ARTICULUS SECUNDUS.

AN EUCHARISTIA EX PRÆCEPTO ECCLESIASTICO SIT NECESSARIA.

Per multa sæcula tam frequenter accedere solebant fideles ad sanctum Eucharistiae sacramentum, ut præcepto divino abunde satisfacerent : cum vero adverterit Ecclesia eos, pietate decrescente, a sacro illo convivio vel omnino recedere, vel diutius abstinere, determinavit tempus quo ad illud accedere sub peccato mortali tenebantur. Hanc legem tulit primo in concilio Lateranensi IV, anno 1215, celebrato, can. 21, his verbis : « Omnis utriusque sexus fidelis, postquam ad annos » discretionis pervenerit, omnia peccata sua..... confi- » teatur.... suscipiens reverenter ad minus in Pascha » Eucharistiae sacramentum : nisi forte de consilio pro- » prii sacerdotis, ob aliquam rationabilem causam, ad » tempus ab ejus participatione duxerit abstinendum ; » alioquin vivens ab ingressu ecclesiæ arceatur, et mo-

» riens christiana caret supultura. » Eam renovavit in concilio Trid., sess. 13, can. 9 : « Si quis negaverit
» omnes et singulos fideles utriusque sexus, cum ad
» annos discretionis pervenerint, teneri singulis annis,
» saltem in Paschate, ad communicandum, juxta præ-
» ceptum sanctæ matris Ecclesiæ ; anathema sit. »

Observanda circa communionem paschalem.

1º Præceptum ecclesiasticum in præfatis concil. Lateran. et Trident. decretis contentum, obligat sub peccato mortali, ut omnes fatentur : imo, juxta fere omnes theologos duplēm imponit obligationem, unam communicandi singulis annis, et alteram communicandi in Paschate. Annus autem, pro communione annuali, incipit a prima die januarii juxta quosdam, ab ultima communione juxta alios, a quindena paschali ad aliam quindenam, secundum probabiliorem et communem sententiam.

Qui tamen per plures annos non communicavit, tene-
tur tantum communicare pro anno nuper elapso, deinde tenebitur pro anno jam incepso, et sic deinceps.

2º Soli baptizati præcepto ecclesiastico communicandi subjiciuntur : patet ex canonibus citatis ubi dicitur, *utriusque sexus fidelis*; et ratio est, quia Ecclesia nullam habet auctoritatem in eos qui foris sunt. In hoc præ-
ceptum istud differt a præcepto divino ipsos infideles mediate obligante.

3º Anni discretionis ex variis circumstantiis pruden-
ter judicandi sunt : non iidem communiter aestimantur pro confessione et pro communione. Unde pueri dolii ca-
paces ad annuam tenentur confessionem, non vero statim obligantur ad communionem ; quia 1º communis usus Ecclesiæ obligationem hujus sacramenti sic interpretata est ; 2º Eucharistia majoris est excellentiæ et non tantæ necessitatis : majorem igitur requirit præparationem, præsertim in pueris prima vice communicaturis, ut deinceps cum debita reverentia ad tantum sacra-
mentum accendant.

4º S. Th., 3 part., q. 80, art. 9, ad 3^{um}, dicit quod, si pueri usum rationis habere incipient, et devotionem erga Eucharistiam concipere possint, sanctum illud sacramen-
tum eis conferri possit; non dicit conferendum. Unde S. Ligorius et plures cum illo docent pueros in ea ætate cœlestem Eucharistiae cibum a profano discernere scien-
tes, ad sacram synaxim admitti posse; sed præcepto non teneri ante annum circiter decimum, et communionem eis non differendam regulariter ultra duodecimum. Caute cavere debent parentes et parochi ne sua culpa pueri ætate jam provecti ad sacram communionem non sufficienter disponantur.

Notandum pueros alios aliis perspicaciores esse, ac proinde non omnes eadem ætate præcepto communionis subjectos : quidam in decimo anno admitti debent; alii ante duodecimum vel etiam decimum quartum admitti nequeunt. Hæc prudens discretio sedula digna est sollicitudine pastoris, qui totus esse debet ut pueros etiam in teneris annis sana doctrina imbuat, moribus christianis informet, ad primam communionem diligenter disponat, et perseverantium eorum omni cura assecurarare intendat.

In plerisque diocesibus, ad præcavenda diversa in-
commoda, determinata est ætas ante quam non liceat pueros ad primam communionem admittere. Tunc ab illa regula recedere non debent parochi.

5º Omnes adulti baptizati memorato Ecclesiæ præcepto tenentur sub peccato mortali ; neque ab illo eximuntur increduli et publici peccatores, quia per fidem et virtutes christianas ad sacram communionem digne susci-
piendam se disponere debent.

6º Non in quolibet anni tempore, sed in Paschate, juxta concil. Lateran. et Trid. verba, implendum est communio-
nis præceptum ; et idcirco hæc communio dicitur pas-
chalis. Nomine autem Paschatis, vulgo intelligitur tem-
pus a dominica Palmarum usque ad dominicam in Albis
inclusive (Benedict. XIV, de Synodo dioces., l. 9,
cap. 16, n. 3, et l. 12, cap. 6, n. 10; Ferraris, v^o Pas-
cha, n. 33). Sæpe ex concessione episcopi, tempus illud

anticipatur vel protrahitur, propter confessariorum paucitatem, pastoris infirmitatem, aliasve rationes quæ iudicio episcopi subjiciendæ sunt. Sed concessiones faciendæ sunt per actus particulares, non vero per modum statuti jus commune evertentis.

7º Præterea, unusquisque fidelis potest, ob rationabilem causam, ex iudicio proprii sacerdotis, id est episcopi, parochi vel alterius sacerdotis approbati, communionem paschalem ad aliud tempus differre, puta, ut convenientius sit dispositus: sed interea facere debet (quod in se est ut requisitas dispositiones quamprimum habeat, et contra Ecclesiæ præceptum mortaliter peccaret si, culpa sua, tempore per confessarium statuto nondum esset paratus).

8º Qui in quindena paschali vel tempore a proprio sacerdote designato communionem omisit, ad eam semper tenetur, et eo magis peccat quo magis differt; quia tempus paschale non fuit determinatum ad finiendum præceptum, sed ne ultra illius impletio differatur. Concilium enim Trid., canone citato, definit esse obligationem communicandi *singulis annis, saltem in Paschate*: qui ergo culpabiliter vel iuculpabiliter non communicavit in Paschate, præcepto communionis annuae adhuc tenetur usque ad Pascha proxime sequens. Qui e contra communicavit ex devotione vel in viatico, sine intentione præcepto satisfaciendi, nihilominus satisfecit, quia sola communio præcipitur, non vero intentio.

9º Qui, quindena paschali jam inchoata, prævidet se in ultimis diebus a communione impeditum fore, statim communicare debet, quia tempus obligationis instat: si vero tempus paschale nondum sit inchoatum, et prævideat se, eo durante, facultatem communicandi non habiturum, ad communionem anticipandam non tenetur, quia præceptum communionis non magis obligat ante tempus præfixum quam præceptum audiendi Missam die dominica obstringit sabbato, si prævideatur impedimentum pro die dominica. Porro, ut supra diximus, tempus, pro communione præscripta *singulis an-*

nis, ex communiori doctorum sententia, computandum est a Paschate ad sequens Pascha.

10º Qui paulo ante tempus paschale communionem accepit, sive ex devotione, sive in viatico, sive ea intentione ut præcepto communionis paschalis per anticipationem satisfaceret, nihilominus, quindena paschali decurrente, communicare debet si possit; quia datur præceptum eo tempore communicandi, nisi legitimum adsit impedimentum. Unde Rituale Romanum, de Communione paschali, in fine, ait: « *Ægrotis quoque parochialibus, etiamsi communionem extra præscriptos Paschatis dies sumpserint, in paschalibus diebus illam deferet ac ministrabit (parochus).»*

Parochus igitur qui prævidet sufficiens sibi defuturum tempus ut in quindena paschali communionem ad ægrotos parochiæ suæ deferat, licentiam eam differendi ab episcopo obtinere debet.

11º Per communionem præcepto communionis annuae non satisfit, ut contra probabilistas declaravit Innocentius XI, anno 1679, sequentem damnando propositionem, n. 55: *Præcepto communionis annuae satisfit per sacrilegam Domini mandationem. (Curs. Complet. t. vi, col. 711.)*

12º Unusquisque communionem paschalem in ecclesia parochiæ suæ a proprio parocho, vel a sacerdote ab eo delegato suscipere debet, nisi, ex illius vel episcopi aut vicarii generalis licentia, privilegio aut consuetudine, in alia ecclesia communicare possit. Sic generaliter theologi in eo sensu canones concilii Lateran. et concilii Trid. intelligentes.

Consuetudine eximuntur 1º sacerdos in aliena ecclesia celebrans; si vero non celebraret, in sua parochia communicare teneretur; 2º peregrini et vagi, nullam parochiam habentes, vel ab illa ita absentes, ut ad eam commodè redire nequeant, præcepto communionis paschalis satisfaciunt, communicando in ea parochia in qua hoc tempore inveniuntur; 3º qui bona fide sacram communionem extra propriam parochiam, absque licentia re-

quisita, excepisset, ad novam non tenetur communionem; 4º famuli vel famulæ in monasteriis regularium degentes et continui commensales, quia ad familiam monachorum vel monialium pertinere censemuntur. Non item ii qui, licet monasterii famulatui annexi, extra illud manent, nec continui sunt commensales, sed extra habitantes, cum extraneis vivunt, quia non sunt de familia. Hinc apud moniales sorores conversæ, novitiae, postulantes, et famulæ intra claustra manentes, præcepto communionis paschalis satisfaciunt in monasterio: non vero aliæ puellæ extra claustra habitantes.

13º Ex consuetis episcoporum statutis, vel ex speciali licentia singulis domibus concessa, alumni seminariorum vel collegiorum, pueri et senes in hospitiis manentes atque sorores charitatis eis servientes, juniores puellæ in scholis detentæ, in sacellis suis respectivis communionem paschalem recipere solent; item magistri et magistræ in his institutionibus commorantes, non vero famuli externi aliisque ad ipsum conventum aut institutum non pertinentes (*Concil. Rhedon.*, *decret. 17*, circa *Communionem paschalem*).

14º Qui, sine licentia pastoris, extra propriam ecclesiam parochiale tempore paschali communicavit, præcepto non satisfecit, nisi forsitan bona fide sic egerit: iterum ergo in parochia sua communicare debet. Quidam excipiunt, nisi in ecclesia cathedrali suæ diœcesis communicaverit; sed probabilius nec in eo casu satisficeret, nisi episcopus declarasset omnes diœcesanos præcepto communionis paschalis in cathedrali satisfacere posse, aut Eucharistiam suscepisset de manu ipsius episcopi, qui est primus totius diœcesis pastor. Vide *Ferraris*, vº *Euch.*, art. 1, n. 13, et *S. Ligorium*, l. 6, n. 300.

15º Licentia pastoris, id est parochi, episcopi aut vicarii generalis, pro communione paschali extra parochiam facienda, potest esse expressa, vel rationabiliter præsumpta, quando ex adjunctis certo judicatur eum consentire aut consensurum esse. Ita *S. Ligorius* et plures apud ipsum; hæc sententia nobis videtur certa.

16º Ex consensu pastorum præsumpto et ex variis recentiorum Cenomanensium episcoporum decisionibus, non exigitur in hac diœcesi ut qui communionem paschalem omiserunt, se hoc anno in propria ecclesia sistant ad communicandum, ne talis obligatio eos a conversione removeat; sed tantum persuasione inducantur, et finaliter eis permittatur ut pro hac vice in aliena ecclesia sacramentum suscipiant.

17º Nunc non exigitur schedula confessionis ut tribuitur communio tempore paschali, nec extraneis ad sacram mensam accendentibus denegatur; quia præsumitur eos licentiam a pastore suo obtinuisse, vel in parochia sua jam communicasse, aut ante finem paschatis communicaturos esse; nec describuntur nomina eorum qui præcepto non satisfaciunt, ut ad episcopum deferantur, sicut olim præscriptum erat.

ARTICULUS TERTIUS.

AN COMMUNIO SUB UTRAQUE SPECIE SIT NECESSARIA.

Certum est 1º eam esse necessariam respectu sacerdotis Missam celebrantis, ut in secunda parte hujus Tractatus ostendemus.

Certum est 2º eam jure divino permissam esse laicis; frequenter enim laici, per decem et tria priora Ecclesiæ sæcula, sacram Eucharistiam sub utraque specie suscipiebant, ut omnes fatentur, et Græci eam sic adhuc recipiunt. Frequenter etiam illud sacramentum sub unica specie conferebatur, v. g., 1º ægrotis, ut patet exemplo Serapionis supra memorati, et *S. Ambrosii* qui, referente *S. Paulino*, in Vita ejus, t. II, Appendix, corpore Domini ab episcopo Vercellensi accepto, ubi glutivit, emisit spiritum; 2º infantibus, qui sub sola specie vini communicari poterant, et nunc apud Græcos eo modo communicantur: « Sacerdos sumnum digitum indicem » tinget sanguine pretioso; mox imponet corpori, deinde » digitum immittet in os infantis, cui statim aqua biberenda præbebitur. » *Renaudot*, t. I. 3º Fideles qui, in

primis sæculis, sacram Eucharistiam apud se reservatam singulatim sumebant, sub unica specie communicabant, et tamen integrum sacramentum suscipere credebant. 4º In Missis præsanctificatorum celebrans sub unica specie communicat. Ergo.

Usus communionem sub unica specie administrandi fidelibus paulatim invaluit, ob duplum præsentim rationem : 1º quia species panis facilius conservabatur quam species vini; 2º quia in administratione illius sacramenti sub specie panis, non tam frequentia occurrerant profanationis pericula quam sub specie vini. Insensibilis illa calicis desuetudo respectu laicorum nullam excitavit reclamationem; quia jam frequenter communio sub una specie accipiebatur, et omnibus persuasum erat utramque speciem ad validitatem sacramenti non esse necessariam.

Versus initium decimi quinti sæculi Jacobus Misnensis, cognominatus *Jacobel*, parochus in civitate Praga, suadente Petro Dresdensi, prædicavit usum calicis fidelibus esse jure divino necessarium. Joannes *Huss* hunc errorem adoptavit; Lutherus et Calvinus postea illum, in odium Ecclesiæ Romanæ, fortiter propugnaverunt; item Anglicani. Contra quos sit

PROPOSITIO.

Nullum est præceptum divinum de sacra Eucharistia sub utraque specie sumenda.

Prob. Hæc propositio est de fide; probatur Scriptura sacra, traditione et ratione theologica.

1º *Est de fide.* Definita enim fuit in concilio Const., sess. 13, contra Hussitas; et in concilio Trid., sess. 21, can. 1, contra Protestantes, his verbis : « Si quis dixerit, ex Dei præcepto vel necessitate salutis, omnes et singulos Christi fideles utramque speciem sanctissimi Eucharistiae sacramenti sumere debere; anathema sit. » Ergo 1º.

2º *Prob. Scriptura sacra.* Joan. vi, 52 : *Si quis mandu-*

caverit ex hoc pane, vivet in æternum; et v. 58 : Qui manducat hunc panem, vivet in æternum. Unde sic : Christus eumdem promittit effectum communioni sub una specie ac communioni sub utraque. Ergo. B. Paulus, I Cor. xi, 27 : *Quicumque manducaverit panem hunc, vel biberit calicem Domini indigne, reus erit, etc., supponit, utendo particula disjunctiva vel, alterutram speciem seorsim accipi posse.* Ergo 2º.

3º *Traditione;* nempe factis supra relatis, quibus constat communionem sub unica specie sæpe datam et sumptam fuisse, ut patet exemplo infirmorum, infantium, fidelium dominibus suis communicantium, et sacerdotum cum præsanctificatis celebrantium. Ergo 3º.

4º. *Ratione theologica.* De fide est totum et integrum Christum esse sub utraque specie : qui ergo unam suscipit speciem, totum suscipit Christum, carnem ejus manducat; et, propter concomitantiam, sanguinem ejus bibit. Ergo præcepto carnem ejus manducandi et sanguinem ejus bibendi satisfacit, nisi ex Scriptura vel ex traditione ostendatur utramque speciem sumendam esse : porro neque ex Scriptura neque ex traditione ostendi potest utramque speciem sumendam esse, sed potius contrarium monstratur : ergo 4º, etc.; aliunde, etc. Ergo.

Dices 1º : Joan. vi, 63 : Nisi manducaveritis carnem Filii hominis et biberitis ejus sanguinem, non habebitis vitam in vobis; ergo Christus communionem sub utraque specie præcepit.

R. Nego conseq. Nam 1º genuinus præcepti Christi sensus ex traditione repetendus est : at traditio, *ut ostendimus*, nos docet Christi fideles sæpe sub unica specie communionem accepisse. 2º Ipsi Calvinistæ vinum in cœna non tribuunt iis quibus grave est post alios sumere, nec iis qui vinum bibere nequeunt : ergo non arbitrantur communionem sub utraque specie jure divino esse præscriptam. 4º Concilium Trid., sess. 21, cap. 1, præfatum textum nobis objectum sic interpretatur : « Qui dixit : Nisi manducaveritis, etc., dixit quoque : Si quis manducaverit ex hoc pane, vivet in æternum. Et quia dixit :